



UKA 2016/120  
21. september 2016

**Tusagassiuutinut tapiissuteqartarneq pillugu Inatsisartut inatsisaat nr.xx. xx 2016-imeersoq**

(Inatsisartunut ilaasortaq Mimi Karlsen, Inuit Ataqatigiit)

Siullermik Inuit Ataqatigiit oqaatigiumavarput tusagassiuutit nunani naqisimaneqanngitsumik ingerlatsiviuffiusuni pingaaruteqartorujussuuartut isigigatsigit. Tusagassiuutit tassaapput inuit oqartussaaqataannerannut, demokratimut aqutissiuussisussat. Aqutissiuussissappullu paasissutissanik siammarterisuullutik taamalu inuit assigiinngitsunik isummersorsinnaanissaannut aqutissiuussissapput. Tusagassiuuteqarneq aamma ulluinnarni ”naalagaaffimmi oqartussaaffiit sisamarisaatut” taaneqartarpoq, tassa tusagassiuutit naqisimaneqaratik saqqummiussisarsinnaanerat naqissusiivigissagaani.

Tusagassiuutinut tapiissuteqartarneq pillugu Inatsisartut inatsisaat takorluugarput tassa Nunatsinni aalajaatsumik qilersorsimanngitsumillu tusagassiuuteqarnissaq. Tusagassiuuteqarnissaq oqaatsit killilersornagit ineriartortillugilli siammaasumik, inuit amerlasuut isummersornissaminut aallerfigisinnaasaat, aammalu isummaminnik annitsivigisinnaasaat.

Tusagassiuuteqarnermut tapiissutit 2.534.000 kr avinneqarput, Tusagassiuutit ingerlatsinerannut tapiissutit 1.503.000kr aappaanullu Tusagassiuutit pilersaaruteqarnerannut tapiissutinut 1.031.000 kr qinuutigineqarsinnaanngorlugit.

Takorloorsinnaavarput Tusagassiuutit qulit missai qinnuteqarpata tamarmik immikkut 150.000 kr missaani pissarsissasut. Tamanna tusagassiuutinut tapitut taaneqarsinnaanersoq apeqqusertariaqarpoq.

Assersuutigalugumi Danmarkimi 370.000.000 kr tusagassiuutinut 61-nut agguarneqartarput. Danmarkimisut iliussagaluarutta 7 mill kr agguaattassagaluarpagut, 2,5-iinnaalli agguaattarpagut.

Agguaassinermut ataatsimiitsitaliami ilaasortat pingasuusussat akissarsiaqartinneqassapput. Tassani apeqqusernarpoq tapiissutaasartunit minnerulaaginnartut agguaassisartunut akissarsiaritinneqassanersut? Agguaassisartut akissarsisarnermikkut Naalakkersuisunut qilersugaasutut misigissannginnersut? Tamakku Naalakkersuisunit akeqqunarput.

Tusagassiuutinut tapiissuteqartarneq tusagassiuutinik kiffaanngissuseqartunik ineriartortitsissaaq. Uani inatsisissami ineriartortitsitsinissaq taama killeqartigisumik periarfissaqarpoq, taamaammallu iluaqutaasinnaanera killeqarpoq.

Naalackersuisunuttaaq apeqqutiginiarparput siornali tusagssiuutinut qinnuteqarsinnaaneq periarfissanngormat qassit qinnuteqarpat aningaasanillu qassinik tunineqarpat?

Tusagassiuutini oqaatsitta eqqortumik atorneqarnissaannut Inuit Ataqatigiinniit siunnersuuterput UKA16-mi aappassaaneernejartussami Naalackersuisoq siullermeerinermi akissuteqarpoq tusagassiuutini oqaatsitta nakkutigineqarnerat Tusagassiuutit pillugit tapiissuteqartarnermut inatsimmi eqqarsaatigineqassasoq.

Tamanna eqquutitinneqanngilaq, nakkutilliinermut tunngasunik piumasaqaatitaqanngilaq, taamaallaalli minnerpaamik tusagassiorneq kalaallisut aamma allaqqanissaa piumasaqaataalluni.

Tassami inatsisartuni oqallisissiaq aallaavigalugu oqallinnermi Partiit tamarmiullutik oqaaseqaat imak nipilik ilalerpaat: Inatsisartut pingaaruteqarluinnartutut isigivaat, kalaallisut oqaatsitta tusagassiuutit aqqutigalugit eqqortumik atorneqarnissaa.

Oqaaseqaat ersarissoq inatsisiliornermi aamma ersarittariaqaraluarpoq.

Tusagassiuutinut tapiissuteqartarnej pillugu Inatsisartut inatsisaat taama isikkoqartillugu, ataatsimiitsitaliamut ingerlaqqinnissaa innersuussutigivarput.